

Ny fianakaviansika talohan'ny nahaterahana, sy ety an-tany ary mandrakizay

Ny fianakaviansika talohan'ny nahaterahana

“Ny fianakaviana dia tendrin’Andriamanitra. Io no rafitra manan-danja indrindra amin’izao fotoana izao sy ho mandrakizay. Na dia talohan'ny nahaterahantsika teto an-tany aza dia tao anatin'ny fianakaviana iray isika. Isika tsirairay ‘dia fanahy izay zanakalahy sy zanakavavy malalan'ny ray aman-dreny any an-danitra’ ary manana ‘toetra sy anjara araka an’Andriamanitra’ (‘Ny Fianakaviana: Fanambarana ho an’ Izafo Tontolo Izafo,’ *Ensign* na *Liahona*, nòv. 2010, 129]. Andriamanitra no Raintsika any An-danitra, ary niaina teo anatrehany isika amin’ny maha-isan'ny fianakaviany antsika tany amin’ny fiainana talohan'ny nahaterahana. Tany isika no nianatra ireo lesontsika voalohany ary nomanina ho an’ny fiainana an-tany (jereo ny F&F 138:56)” (*Manuel 2: Administration de l’Eglise* [2010], 1.1.1).



“Mivavaka amin’ilay Andriamanitra lehibe izay nahary izao rehetra ary izao isika. Izy no Raintsika any An-danitra. Nisy isika noho Izy. Zanany ara-panahy isika. Nitoetra niaraka Taminy tany amin’ny fiainana talohan'ny nahaterahana isika ary fianakaviany. Fantatsika Izy toy ny fahafantarantsika akaiky sy lalina ireo raintsika ety an-tany mandritra izao fisiansika izao” (Bruce R. McConkie, *How to Worship*, Brigham Young University Speeches of the Year [20 jolay, 1971], 2).

Fanontaniana ifanakalozan-kevitra:

- Tamin'ny fomba ahoana no naha-ampahany fototra ny fianakaviana tamin’ny fiainantsika talohan'ny nahaterahana?
- Nahoana no manampy ny mahafantatra fa Andriamanitra dia Rainao ary ianao dia anisan’ny fianakaviany izay tiany tany amin’ny tontolo talohan'ny nahaterahana?
- Mety ho toy ny ahoana araka ny eritreritrao ny fifandraisanao tamin’ireo Ray Aman-dreninao any An-danitra?

Ny fianakaviansika ety an-tany

“Tafiditra ao anatin’ny drafitry ny Raintsika Any An-danitra ny hoe teraka tao anaty fianakaviana isika. Namorona fianakaviana Izy mba hitondrana fahasambarana ho antsika, mba hanampiana antsika hianatra fitsipika marina ao anatin’ny tontolo feno fitiavana, ary hanomana antsika ho amin’ny fiainana mandrakizay.

“Manana andraikitra lehibe ireo ray aman-dreny amin’ny fanampiana ny zanak’ izy ireo hiomana hiverina any amin’ny Ray any An-danitra. Manatanteraka izany andraikitra izany ireo ray aman-dreny rehefa mampianatra ireo zanany hanaraka an’ i Jesoa Kristy sy hiaina ny filazantsarany” (*Manuel 2: Administration de l’Eglise*, 1.1.4).



“Andriamanitra no mpahary ny fianakaviana. Ny fikasany dia ny tokony hahatongavan’ny fahasambarana lehibe indrindra, ny lafiny mahafapo indrindra eo amin’ny fiainana, ary ny hafaliana lalina indrindra ao anatin’ny fiarahantsika miasa sy ny fifampikarakarantsika amin’ny maha-ray sy reny ary zanaka antsika” (Gordon B. Hinckley, “What God Hath Joined Together,” *Ensign*, mey 1991, 74).

Fanontaniana ifanakalozan-kevitra:

- Amin’ny fomba ahoana no maha-ampahany fototra ny fianakaviana amin’ny fiainantsika ety an-tany?
- Mety ho hafa manao ahoana ny fiainantsika ety an-tany raha toa isika ka nalefa tety an-tany tsirairay fa tsy nisy fianakaviana—tsisy ray, reny, iray tampo, razambe, na taranaka?
- Inona ireo traikefa izay nanampy anao hahatakatra ny anjara asa sy ny maha-zava-dehibe ny fianakaviana ety an-tany?

Ny fianakaviansika mandrakizay

“Ny drafitra masin’ny fahasambarana no ahafahan’ny fifandraisana eo amin’ny fianakaviana haharitra mandrakizay any ankoatra ny fasana” (“Ny Fianakaviana: Fanambarana ho an’Izao Tontolo Izao,”) (*Ensign* na *Liahona*, nôv. 2010, 129).



“Raha toa ny famonjena antsika tsirairay ka miankina amin’ny fankatoavantsika manokana, dia zava-dehibe mitovy amin’izany koa ny fahatakarantsika fa isika tsirairay dia ampahany manan-danja sy tena ilaina ao amin’ny fianakaviana ary ny fitahiana ambony indrindra dia tsy azo raisina raha tsy ao anatin’ny fianakaviana mandrakizay ihany. Rehefa mandeha araka ny namolavolan’Andriamanitra azy ny fianakaviana, dia ny fifandraisana misy ao no sarobidy indrindra amin’ny fiainana an-tany. Ny drafitry ny Ray dia ny hitohizan’ny fifankatiavana sy ny fiarahan’ny fianakaviana any amin’ny mandrakizay. Ny firaisan-kina ao amin’ny fianakaviana dia

mitondra andraikitra goavana amin’ny fikarakarana, fitiavana, fampaherezana, ary fampatanjahana ny olona tsirairay ao amin’ny fianakaviana mba hahafahan’ny rehetra maharitra am-pahamarinana hatramin’ny farany ary hitoetra miaraka any amin’ny mandrakizay. Tsy ampy ny mamonjy ny tenantsika. Manan-danja toy izany koa ny hahavoavonjy ny ray aman-dreny sy ireo mpiray tampo amintsika ao amin’ny fianakaviansika. Raha miverina ireny any amin’ny Raintsika any An-danitra isika dia hanontaniana hoe ‘aiza ny sisa amin’ny fianakavianao?’ Izany no antony hampianarantsika fa ny fianakaviana dia mandrakizay. Ny toetra mandrakizain’ny olona iray dia lasa toetra mandrakizain’ny fianakaviana” (Robert D. Hales, “The Eternal Family,” *Ensign*, nôv. 1996, 65).

Fanontaniana ifanakalozan-kevitra:

- Amin’ny fomba ahoana no maha-ampahany fototra ny fianakaviana amin’ny anjarantsika mandrakizay?
- Inona avy ireo asan’ny fahamarinana vitsivitsy azon’ny tsirairay ao amin’ny fianakaviana atao mba hifanavotan’izy ireo?
- Oviana no nisy olona iray ao amin’ny fianakavianao nankahery na nampatanjaka anao hany ka naniry ny haharitra hatramin’ny farany ianao?

